

## SALOMONI YOKEMAE

Salomoni'a avo'mo kae male'niya yokemo'mo mago kini vekamo'a a'ae'mo hau ayamopafi'mo hau'niya yokemo hane'niye. Hu'niya kava huno a kanomo hau ayamopafi'mo hau'niya vekae'mo hau'nigeno agaefe'mo ava gemo huno hapa pai'niye.

Kini vekamo'a a'ae'mo hau'niya kava huno Yesu'a agai'a siosi vaya'aife'mo hau ayamopafi'mo hau'niye. Ani a kanomo'a anau'amofe'mo hau'niya kava hu'a siosi vaya'mogi Yesu Kalaisife'mo hapau apayamopafi'mo hapau'nige'a akame nehae.

<sup>1</sup> Mani yokemo Salomoni'a avo'mo kae male'niya yokemo'mo muki yoke'amo ago aeno agase'niye. <sup>2</sup> Nagaefe'mo kahau kayamopafi'mo kahau'niya kava'mo'a alagepa nofi alagafati ani'mo'a nehiya agufa haga'amo ago aeno agase'niya'mofe'mo yafaya'mo huka natesanafe'mo ne'nahaiye. <sup>3</sup> Asole alagepa atumo ne'aiya uvelileti'mo kagufale'mo fale male'nanageno kagufalegati'mo alagepa atumo ne'aiye. Kagikamo'mo alagepa atu'mo ne'aiya ani'mo aino laki'niya anikana huno hane'nenno alagepa atumo ne'aiya'mofe'mo ve'e'mo magokepi lokae'a ohavae'naya a'mafa'ne anaga'mogimo kagaefe'mo hapau apayamopafi'mo nehapaiye. <sup>4</sup> Kagaemo nayate heka navayu hulika ne' egetao lagaemo nagu nagu huta eta kakame huta ugunne.

Kini vekamo'a navalelino uno no'afi'mo maisuvafe'mo nate'niye.

Kao vaya'mogitamo kagaefeke'mo lamogaga aiteta amuse hugune. Apakaemo alagepa nofi alagafati anife'mo apakesamo afi'a apamogaga ne'aiya'monanafa lagaefe'mo kahau kayamopafi'mo kahau'niya kavafeke'mo lagesa afifi huta lamogaga aigune. Fatago vaya'mogi kagaefeke'mo hapau apayamopafi'mo nehapaiye.

<sup>5</sup> Yulusalemu a'mafa'ne anaga'mogitapae, huno, nagufa'amo anupa nagufamo hane'niya'monanafa kanale nagufa'e a kanomo mai'nove. Nagaemo Keta vaya'ai seli no'apigana hu'na mai'nova'monanafa Salomoni'a alagepa lavolavomo asai male'niya lavolavogana hu'na mai'nove. <sup>6</sup> Anupa nagufamo hane'niya'mofe'mo afa a kanoe, hutapa o'nageyo. Yegemo'mo naleno alino ani agufa nagufamo kalino nate'niye. Ita'nimo'a ve mafa'ne anaga'amogi apaipamo le'a natete'apae'mo, uka nofi hoyatile'mo yagaiyo, hu'a naha pai'nae. Vaehae, nagai'ni hoyanile'mo alagepa hu'na o'yagai'nove.

<sup>7</sup> Lusi kava huno nahau nayamopafi'mo ne'nahaiya veka'nimogae, hu'na, sipisipi anagakamo haiyategamo apavalelika uka ne'ya'mo alika ne'apamine. Yegemo haineno namotule ne'aeya afina'mo haiyategamo apavalelika uka ne'apatanage'a mai'a falu nehae. Naha paige'nao hosu kavanage'na ka'mo atale'na kavagi vaya'ai sipisipi'e'mo magokepi lokae'na maino.

<sup>8</sup> Alagepa kanale a kanomogae, huno, muki a'ne anaga'mo ago aeka apakase'nane. Ani kotegamo o'age'nisana'mo'mo sipisipi anaga'ai apaiyakamo alinika aise meme anagakamo apavalelika uka sipisipile'mo ne'yagaiya vaya'ai seli no haopale'mo uka ne'ya'mo alika apamiyo. <sup>9</sup> Nahau nayamopafi'mo ne'nahaiya a'nimogae, huno, Kagaemo Kini vekamo Felo hosi anaga'amogi kame hisayafe'mo talalamo halauli'a ne'vaya hosigana huka mai'nane. <sup>10</sup> Muki kayokate'mo hane'niya konali yakamo'a kaugosafi'mo aeno ha nele. Kagaemo kanale sesumo lugokafi'mo huka ali'nanageno alagepa huno aeno ha nele.

<sup>11</sup> Lagaemo konali yakamo goli yafateti'mo alo huge siluva yafateti'mo alo huge huteta kamigune.

<sup>12</sup> Kini veka'nimo hi'yalamu'ale'mo siate'mo fai mai'nigeno'ae'mo fale male'nova ani'mo'a alagepa atu'amo'mo aino atagu nefae. <sup>13</sup> Nahau nayamopafi'mo ne'nahaiya veka'nimo'a meya hayafati'mo alagepa atumo ne'aiya anikana huno mai'neno muki hani'ilagamo nu'nila'mogani folagapi'mo havaegaiye. <sup>14</sup> Nahau nayamopafi'mo ne'nahaiya veka'nimo'a Enigeti kotegati'mo nofi hoyafati'mo yosa ausemo'mo alagepa atumo ne'aiya yosa ausegana huno mai'niye.

<sup>15</sup> Nahau nayamopafi'mo ne'nahaiya a'nimogae, huno, vae, alagepa kanale a kanomo mai'nane. He, alagepa kanale a kanomo mai'nane. Kaulagamo'a kaugo'yavemo aulagagana huno hane'niye.

16 Nahau nayamopafi'mo ne'nahaiya veka'nimogae, hu'na, Vae, alagepa kanale vekamo mai'nane. He alagepa kanale vekamo mai'nane. Hipati'amo alino hegafa hu male'niye. 17 Nokoti'ale'mo kanale yosamo hane'niye. Yofu yosamo sita yosamo hane'nigeno hanae yosamo paini yosamo hane'niye.

## 2

1 Nagaemo Salonigayaga yahaofati'mo kahaumo'a haesa ausemo neheya ausegana hu'na maige ave aiyamo folagapi'mo hane'niya yaveyave kahaumo ausegana hu'na maige hu'na mai'nove. 2 Aufe kahaumo hane'niya folagapi'mo kanale yaveyave kahaumo ausemo hane'niya kava huno nahau nayamopafi'mo ne'nahaiya a'nimo'mo a'mafa'ne anaga'ai folagapi'mo mai'niye.

3 Alagepa alagamo ne'aeya yosamo yahaofilaga yosamo hane'niya folagapi'mo hane'niya kava huno nahau nayamopafi'mo ne'nahaiya veka'nimo ve mafa'ne anaga'ai folagapi'mo mai'niye. Nagaemo lusi yegemo nelege'nae'mo ani yosamo ulunapi'mo itopale'mo mai'ne'nae'mo lusi kava hu'na namogaga ai'nove. Ani yosa alagamo lagi'na ne'nogeno navayafilagati'mo lusi kava huno haga'age ne'nahaiye.

4 Agaemo alopa ne'ya'mo ne'naya no'afi'mo navalelino haino nagaefe'mo hau ayamopafi'mo hau'niya kavatefe'mo kalahau'me'mo nagenopale'mo asai male'niye. 5 Nagaefe'mo hau ayamopafi'mo hau'nige'nae'mo lokiya'nimo

alagi ohane'niya'mofe'mo nofi alagafati ani'mo alika namiteka alika lokiya vaika nato. Alagepa apoli alagamo alika namige'na ne'na falu hino. <sup>6</sup> Hoga ayateti'mo nageyutega maleteno lamaga ayateti'mo nagufale'mo natafauno mai'niye. <sup>7</sup> Yulusalemu a'mafa'ne anagane, hu'na, lokiya gefati'mo hu'nae'mo, afela afumogimo koli hute'a apaune nehaya afu anaga'mogi nehaya kavafe'mo lapakesamo afitetapa nahau nayamopafi'mo ne'nahaiya a'nimo aupati'mo haunetapa o'ateyo. Agai'amo hau'ninageno aupati'mo he tigiye.

<sup>8</sup> Nahau nayamopafi'mo ne'nahaiya veka'nimo agemo afi'nove. Agaemo aeno hailo hailo hulino nagu nagu huno avelegamo ne'e. <sup>9</sup> Nahau nayamopafi'mo ne'nahaiya veka'nimo'a kanale afela afugana huno nagu nagu hulino ne'e. Ago eno kumate'mo he tino mai'nen'ae'mo aise yasi kateti'mo nopilagamo aulu heno age'niye. <sup>10</sup> Nahau nayamopafi'mo ne'nahaiya veka'nimo'a naha pai'niye. Agaemo naha paino'ae'mo, Nahau nayamopafi'mo ne'nahaiya a'nimo alagepa kanale a'nimogae, huno, he tika kumatega emikeka nagae'e'mo magokepi lokaeka eno. <sup>11</sup> Kagaemo yasi kofe'mo koli osuvo. Ko'mo ne'aiya afina'mo ago hano hu'niye. <sup>12</sup> Hemenimo muki haopalegamo kahau ausemo ago he'nige'apae'mo nama anaga'mogimo yoke nehae. Kaugo'yave anaga'mogimo yoke hu'nage'apae'mo muki haopalegati'mo vayatimogimo ne'afiye. <sup>13</sup> Fiki yosamo'a aepa faino alagamo ae'nigeno'ae'mo

nofi'mo'a ausemo he'nigeno alagepa atumo ne'aiye. Nahau nayamopafi'mo ne'nahaiya a'nimo alagepa kanale a'nimogae, huno, he tika egeta'ao ugu'ae. <sup>14</sup> Kaugo'yave nama'nimo yafakapi'mo mai'nane. Aulafi kate'mo haika fala kika mai'nane. Kanale kaugosamo alika nave lige'na ageno. Kagemo alagepa kagemo hane'nigi kage aige'na afino.

<sup>15</sup> Aise afela kala anaga'mo apatafauka apanu kiyo. Fiku yanage'a hoyatifi'mo hai'e'a nofi'mo ali'a hosu hu'a ategae. Nofitimo'a saufa alagamo ae'niya'mofe'mae.

<sup>16</sup> Nahau nayamopafi'mo ne'nahaiya vekamo nagai'ni veka'nimo mai'nige'na agai'a a'amo mai'nove. Agaemo sipisipi anaga'amo apavalelino u'nige'apae'mo kanale yaveyave kahaumo'mo ause he'niya folagapati'mo kahaumo ne'nae. <sup>17</sup> Nahau nayamopafi'mo ne'nahaiya veka'nimogae, hu'na, o'nataleka malage huka aika atagineka eka alino fako huno la'ate'niya avelegamo haikeka kanale afela afugana huka nagu nagu huka egeta'ao nage'e'mo maim maim ne'visu'ageno'ae'mo kotisigeno'ae'mo hani hu'niya kava'mo hano hino.

### 3

<sup>1</sup> Hani'ilagamo hipa'nile'mo havae'ne'nae'mo nahau nayamopafi'mo ne'nahaiya veka'nie'mo kahauya hu'nova'monanafa o'age'nove. <sup>2</sup> Nagaemo he ti'na taonifi'mo u'ne'na hu'na muki ka'ale'mo kahauya hu'na agegauve, hu'na nagesamo afi'nove. Nagaemo kahauya

hu'nova'monanafa o'age'nove. <sup>3</sup> U'ne'na nehuge'apae'mo taonifi'mo u'e'a hu'a ne'yagaiya vaya'mogimo ne'nagage'nae'mo, Nahau nayamopafi'mo ne'nahaiya veka'nimo age'nafiye, hu'na apafi ge'nove.

<sup>4</sup> Nagaemo apatale'na uvategamo malage hu'na ne'nahaiya veka'nimo age'nove. Nagaemo agaetegamo u'nae'mo agaemo natalesiyafe'mo o'nahau'nige'nae'mo anu ki'na mai'nove. O'atale'na avaleli'nu'na alino nate'niya ita'nimo'mo nehavaeya yapilagamo uta'a hai'no'ae. <sup>5</sup> Yulusalemu a'mafa'ne anagane, hu'na, lokiya gefati'mo hu'nae'mo, afela afumogimo koli hu'a apaune nehaya afu anaga'mogi nehaya agufa kavafe'mo lapakesamo afitetapa nahau nayamopafi'mo ne'nahaiya vekamo aupati'mo haunetapa o'ateyo. Agai'amo hau'ninageno aupati'mo he tigiye. <sup>6</sup> Ageyo. Ina la'mo yahaofilagamo ani'mo ohane'niya kotegati'mo haine ne'e. Maketileti'mo miya nefaiya la'nefamo atafi'mo nekaya afina'mo alagepa atumo ne'aigeno halina'amo'mo posigana huno hane'nenon halinamo ailinuno nehaya kava huno haine ne'e. <sup>7</sup> Ageyo, hu'na, Mago vaya'mogi Salomoni siamo alini'a ne'ae. Sigisiti'a Isaleli ati vaya'mo koli nosaya lokiya ati vaya'mogimo fai'a ku ai'a ateli'a ne'ae. <sup>8</sup> Muki vaya'amogimo kame nehaya kava'mo age'a alagepa hu'naya vaya'mogi naipe'apimo alini'a ne'ae. Hani'ilagamo afole ne'aiya kavafe'mo koli nehaya'mofe'mo naipe'apimo apalute'mo male'nae. <sup>9</sup> Kini vekamo Salomoni'a Lemanoni kotegati ali'naya alagepa yosaleti'mo alini u'e'a

nehaya sia'amo mago aise nokana huno ki'niye. <sup>10</sup> Agaemo siluva yafateti'mo posi'amo alo huge goli yafateti'mo afe'alumelaga'amo alo huge huno alo huteno haesa lavolavoleti'mo aino ati kae male'niye. Yulusalemu a'mafa'ne anaga'aife'mo hau ayamopafi'mo hau'niya kavateti'mo yu'ilaga'amo alagepa huno alo hu'niye. <sup>11</sup> Saiyoni a'mafa'ne anagane, hu'na, lapakaemo etapa kini vekamo Salomoni'mo ageyo. Agaemo agenopale'mo kini kakolitamo hane'niye. Kini vekamo Salomoni'a a'mo ali'niya afina'mo lusi kava huno amogaga ai'nigeno'ae'mo ita'amo'mo ani kakolitamo alino agenopale'mo maleno ateteno kini vekamo lekana paino ate'niye.

## 4

<sup>1</sup> Nahau nayamopafi'mo ne'nahaiya a'nimogae, huno, vae, alagepa kanale a kanomo mai'nane. He, alagepa kanale a kanomo mai'nane. Kaulagamo'a kaugo'yavemo aulagagana huno hane'nigeno kanale kayoka'mo'a aino ati kae'niye. Kayoka'mo'a meme anaga'mogi Gileyati avelegati'mo magokepi lokaeli'a nelamiya meme anaga'ai apayokakana huno hane'niye. <sup>2</sup> Muki kave'amo'mo yaveyave sipisipi anaga'mogi apayoka'mo magoke aiyaya hu'a lagau'a apatete'a hemenimo ani'mo fale'a apate'nageno'ae'mo apayoka'mo'a yaveyave'age nehiya kava huno kave'mo'a yaveyave'age'mo nehiye. Mani muki sipisipi anaga'mogimo lago'ya apana'aumo male'nae. Mago anamo sipisipimo o'mai'nae. <sup>3</sup> Kavayamo kanale

haesa nofikana huno hane'nigeka alagepa kagemo ne'aine. Kayoka'mo'a aino ati kae'niya kagesa aepale'mo mago yosamo agi'amo pamagalanati alagamo aino apalo ati'niya yosa alagagana huno hane'niye. <sup>4</sup> Lugokamo'a kini vekamo Nevini'a kame nehia ya'amo male'niya no'mo yatala vegovego nokana huno hane'niye. Ani nopi'mo lokiya kame nehaya vaya'ai halegu'apimo tauseni'a halegu'mo asai male'nae. <sup>5</sup> Lole nukala'mo'a kanale lago'ya afela afula'moganimo yaveyave kahaumo ausemo hane'niya folagapati'mo kahaumo ne'na'a afulakana huno hane'niye.

<sup>6</sup> Nagaemo alagepa atu ne'aiya yosamo hane'niya avefi'mo hai'na maime maime ne'visugeno'ae'mo kotisigeno'ae'mo hani hu'niya kava'mo hano hugiye. <sup>7</sup> Nahau nayamopafi'mo ne'nahaiya a'nimogae, huno, alagepa kanale a kanomo mai'nane. O'ani'ya faifa ya'mo kagaete'mo ohane'niye. <sup>8</sup> A'nimogae, huno, kagaemo nage'e'mo Lemanoni aveleti'mo ataleka ugeta'ao. Amana avelegati'mo agege Sena avelegati'mo agege Hemoni avelegati'mo agege huka ago. Ani lole'e mago'e avefi'mo Laiyoni anaga'e Laiyonigana hu'a mai'naya afela pusi anaga'e'mo mai'nae. <sup>9</sup> Nasa'nimogamo a'nimae, huno, kagaemo aise'ato'amo nagaemo aulu nahaeka ne'naganageno'ae'mo naipafi'mo lusi kava huno naha'ye hu'niye. Nagaemo lugokamo agete'nae'mo kagaete'mo asagau'na ne'auve. <sup>10</sup> Nasa'nimogamo a'nimae, huno, Nagaefe'mo kahau kayamopafi'mo kahau'niya

kava'mo'a alagepa kanale kava'mo hane'niye. Ani kahau'niya kavakamo haga'amo'mo nofi alagafati ani'mo nehiya haga'amo alagi ago aeno agase'niye. Ani nefalana ani'mo'a alagepa atu'amo'mo muki alagepa atumo ne'aiya ya'mo atu'amo ago aeno agase'niye. <sup>11</sup> O a'nimogae, huno, Kavayafati'mo kevegeve anumo asagauno ne'aiye. Kavenafu'namo afe'alumelaga kevegevemo anu'e nu'anue'mo hane'niye. Kukenakalegati'mo alagepa atumo Lemanoni avefati'mo ne'aiya agufa alagepa atumo ne'aiye.

<sup>12</sup> Nasa'nimo'mo maige a'nimo maige huno mai'niya a'nimo'a hoyale'mo kegi'yamo'a faino ku ai'niya hoyagana huno maige keli kotupi ani'mo muki vaya'mogimo o'nesayafe'mo ka akani male'niya keli kotupi anikana huno maige ani'mo kanage kanage huno haine ne'eya anite'mo loki ae male'niya anikana huno maige huno mai'niye. <sup>13-14</sup> Kagae hoyafati yosamo'mo alagepa alagamo ne'ae. Haga atumo ne'aiya ya'mo nehage. Mago'aleti'mo alagepa atumo ne'aiya ya'mo alo huge haga ne'ya'mo alo huge la'nefamo atafi kageno halinamo ne'aigeno'ae'mo alagepa atumo ne'aiya la'nefamo alo huge hu'a alo nehae.

<sup>15</sup> Kagaemo kanage kanage huno haine ne'eya ani'mo'a muki hoyafilagamo nelamiya anikana huka maige Lemanoni avefati'mo emine ne'eya anikana huka maige huka mai'nane. <sup>16</sup> Hoga haopalegati'mo yasimo alinika eno. Lamaga haopalegati'mo yasimo alinikeka

hoya'nifi'mo aligeno'ao alagepa atumo ne'aiya ya'mo'a muki haopalegamo ailino uneno hino. Nahau nayamopafi'mo ne'nahaiya veka'nimo'a hoya'afati'mo eno alagepa yosa alagamo lagino neno.

## 5

<sup>1</sup> Nasa'nimogamo a'nimogae, huno, Nagaemo hoya'nilegamo ago e'na alagepa atumo ne'aiya ya'mo agi'amo meya'e mago alagepa atumo ne'aiya ya'e'mo ali'na anupa hu'nove. Nagaemo kevegevemo ali'na ano'a'e anu'a'e'mo ne'nove. Nagaemo nu'anue nofi alagafati ani'e'mo ali'na ne'nove. Nao vaya'nimogitapae, huno, alitapa neyo. Nahau nayamopafi'mo ne'nahaiya vaya'nimogitapae, huno, He, ani'mo alita netapa lapamu hiyo.

<sup>2</sup> Hani'ilagamo nau kale'nova'monanafa nagupi mafa'nemo'a au'mo okaleno afa'a mai'niye. Nahau nayamopafi'mo ne'nahaiya veka'nimo agemo afi'nove. Kita'nile'mo hakalu hakalu huteno, Nasa'nimogamo nahau nayamopafi a'nimogae, huno, Kitamo yakika nato. Hani'ilagamo ani'mo'a emineno nagenopafi'mo ani'mo faleno nate'nigeno nayokapi'mo lao ya'mo emineno havai te'niye, huno naha pai'niye. <sup>3</sup> Nagaemo kukena'nimo ago asagi'na atale'novanage'na halate haiya kava hu'na ali'na vaiguve. Nagaemo naiya'nimo ago sese hu male'novanage'na halate he ti'na u'ne'na hisugeno naiya'nile'mo o'ani'ya faigiye, hu'na ha pai'nove. <sup>4</sup> Nahau nayamopafi'mo ne'nahaiya veka'nimo'a kitamo alita ne'yakuna

yate'mo aya'mo ali'nige'na agete'nae'mo naipamo'mo he ti'niye. <sup>5</sup> Nagaemo kitamo yaki'na atesuvafe'mo he ti'na kitamo alita ne'yakuna ya'ale'mo naya'mo ne'alugeno'ae'mo meya ani'mo alagepa atu ne'aiya ani'mo nayate hane'niya ani'mo'a kita alita ne'yakuna ya'ale'mo aeno kamae'niye. <sup>6</sup> Nagaemo nahau nayamopafi'mo ne'nahaiya veka'nimo kita yaki'na ate'nova'monanafa ago utege'na nagaemo o'age'nove. Nagaemo hu'niya ge'ae'mo nagesamo ne'afugeno'ae'mo naipamo'mo alagi hosu'niye. Nagaemo agaefe'mo kahauya hu'nova'monanafa o'age'nove. Nagaemo keya ae'na ge hu'nova'monanafa agaemo ge'nile'mo aeno atagaina huno ge osu'niye. <sup>7</sup> Umenitata nehu'a taonifi'mo ne'yagaiya vaya'mogi nage'tapae'mo namagi'a nagufamo ai'a atalagau'nae. Yafa lafi kegi'yale'mo ne'yagaiya vaya'mogi naugosafi'mo ai'na ati kae'na ne'aluva lavolavo'nimo ali'nae. <sup>8</sup> Yulusalemu a'mafa'ne anaga'mogitapae, huno, Lapakaemo nahau nayamopafi'mo ne'nahaiya veka'nimo agetapae'mo agaefe'mo nahau nayamopafi'mo nahau'niya'mofe'mo lokiya'nimo ohane'niye, hutapa ha paiyo, huno hapa pai'niye.

<sup>9</sup> Alagepa kanale a kanomo mai'neka muki a'ne anaga'mo ago aeka apakase'nana a kanomogae, hu'a, kahau kayamopafi'mo kahau'niya vekamo haiya kava huno mai'nenomuki hapau apayamopafi'mo nehapaiya vaya'mo aeno apakase'niye. Haiya kava huno mai'nenomuki hapau apayamopafi'mo nehapaiya vaya'mo aeno apakaseno mai'niya'mofe'mo lokiya gefati'mo

hiyo, huka laha paine, hu'a ha pai'nae.

10 Nahau nayamopafi'mo ne'nahaiya veka'nimo yaveyave augosamo hanege haesa augosamo hanege huno hane'niye. Agaemo asole tausen'i'a vaya'mo ago aeno apakase'niye. 11 Agenopamo'mo hogote goli yafakana huno le'nigeno ayokaku'mo kanale alopa ayokaku'mo mago anupa namamo ayokagana huno hane'niye. 12 Aulagamo'mo kaugo'yave nama anaga'mogi nu'mo anuleti'mo ani'mo fale'a u'a ani agi'nale'mo he ti'a mai'naya namagana huno hane'niye. 13 Agalametalegati'mo alagepa atumo ne'aiya yosamo aise yosamo hi'yalamute'mo hane'niya yosagana huno hanege kahaumo ausemo aulafilega hane'niya kahaumo ausegana huno hanege huno hane'niye. Avayamo kanale kahaumo ausegana huno hane'nigeno avayafati'mo alagepa atumo ne'aiya ani'mo meya ani'mo lape tape huno asagauno ne'aiye. 14 Ayatala'mo'a goli linimo apayate'mo ne'vaiya linigana huno hane'niye. Alopa monileti'mo miya nefaiya yafa'mo aeno ha neleya yafa'mo apayate'mo ne'vaiya linifi'mo ne'malaya linigana huno hane'niye. Agufamo'a elefeni afumo avekana huno hane'nigeno agufalegati'mo yaveyave'age huteno aeno ha le'niye. 15 Aiya'ala'mo kanale yaveyave yafateti'mo alo nehaya posila'mo golilate'mo ae'a he ti'a ate'nageno hane'niya posigana huno hane'niye. Agaemo Lemanoni avegana huno maige alagepa sita yosagana huno maige huno mai'niye. 16 Avayafati'mo haga hu'niye. He,

muki agufa'amo alagepa agufamo hane'niye. Yulusalemu a'mafa'ne anaga'mogitapae, hu'na, Agaemo nahau nayamopafi'mo ne'nahaiya veka'nimo maige nao veka'nimo maige huno mai'niye, hu'na lapa pai'nove, huno hapa pai'niye.

## 6

<sup>1</sup> Alagepa kanale a kanomo mai'neka muki a'ne anaga'mo ago aeka apakase'nana a kanomogae, hu'a, Kahau kayamopafi'mo kahau'niya vekamo haiyategamo uno mai'niye. Lagaemo kagae'e'mo magokepi lokaeta kahauya huta agesunafe'mo haiya kate'mo u'niye, hu'a afi ge'nae. <sup>2</sup> Nahau nayamopafi'mo ne'nahaiya veka'nimo hoya'afi'mo uno mai'niye. Agaemo sipisipi anaga'amo hoya'afati'mo nesayafe'mo apavalelino u'niye. Agaemo kanale yaveyave kahau ausemo alino anupa huno malesiyafe'mo hoya'afi'mo uno mai'niye. <sup>3</sup> Nahau nayamopafi'mo nahau'niya vekamo nagai'ni veka'nimo mai'nige'na agai'a a'amo mai'nove. Agaemo sipisipi anaga'amo apavalelino u'nige'a kanale yaveyave kahaumo'mo ausemo he'niya folagapati'mo kahaumo ne'nae, huno hapa pai'niye.

<sup>4</sup> Nahau nayamopafi'mo ne'nahaiya a'nimogae, huno, vae, kanale taonimo Tilisi taonigana huka mai'nane. Kanale taonimo Yulusalemu taonigana huka mai'nane. Asole ati vaya'mogimo asole kalahau'me'mo alini'a ne'vage'a apakete'apae'mo hapau ne'aiya asole ati vayakana huka mai'nane. <sup>5</sup> Aulu

nahaeka o'nago. Kaulagamo'mo ago aeno nagase'nige'na kagaefe'mo ne'nahaiye. Kayoka'mo'a meme anaga'mogi Gileyati avelegati'mo magokepi nelamiya meme anaga'ai apayokakana huno hane'niye. <sup>6</sup> Muki kave'akamo'mo yaveyave sipisipi anaga'mo hemenimo ani'mo fale'a apate'nageno'ae'mo apayoka'mo'a yaveyave'age'mo nehiya kava huno kave'mo'a yaveyave'age'mo nehiye. Mani muki sipisipi anaga'mogimo lago'ya apana'aumo male'nae. Mago anamo sipisipimo o'mai'nae. <sup>7</sup> Kayoka'mo'a kagesa aepale'mo aino ati kae'niya kagesa aepamo'mo mago yosamo agi'amo pamagalanati yosa alagamo aino apalo ati'niya yosa alagagana huno hane'niye.

<sup>8</sup> Kini vekamo a'ne anaga'mo asole a'ne anaga'mo mai'nae. Sigisiti'a kuvini a'ne anaga'mo maige henaga a'ne anaga'amo eiti'amo maige lekana opaisuna agufa alu a'mafa'ne anaga'mo ali'niya a'ne anaga'amo maige hu'a mai'nae. <sup>9</sup> Mai'naya'monanafa kaugo'yave nama'nimo'a aeno apakaseno haino hapai'niye. Asole a'ne anaga'mo mai'naya'monanafa a'nimo magoke'age'mo mai'niye. Ita'amo'mo magoke a'mafa'ne'amo mai'niye. Alino ate'niya ita'amo'mo, hogote a'mafa'ne'nimo mai'niye, huno agesamo afi'niye. Muki a'mafa'ne anaga'mogi agete'apae'mo hao ke he'nae. Kuvini a'ne anaga'mogi'e kini vekamo alu a'ne anaga'amogi'e'mo agi'ale'mo ali'a asaga hu'a ate'nae.

<sup>10</sup> Aulu ne'nahaeya a kanomo ina la'ae. Kaimo'a alagepa huno aeno ha lege yegemo'a

alagepa huno aeno ha lege huno aeno ha neleya kava huno aulu ne'nahae. Asole ati vaya'mogimo asole kalahau'me'mo alini'a ne'vage'a apakete'apae'mo hapau ne'aiya ati vayakana huno mai'niye, huno hapa pai'niye.

<sup>11</sup> Nagaemo kago'muflagati'mo ne'aeya yosa alagamo agesuvafe'mo lami'na alagepa yosamo'mo alagamo ne'aeya yosa hoyafi'mo mai'nove. Nofi'mo alagepa huno hane'nifi pamagalanati yosamo'a ause he'nifi hu'na agesuvafe'mo lami'nove.

<sup>12</sup> Nagesamo o'afi'nogeno'ae'mo malage huno nagupi mafa'nemo'a alino he tino nate'nige'na ali'na namalagite'nae'mo visuvafe'mo nehuve. Hapau'nisiya vaya'nilefe'mo hosimo'mo halaulino ne'viya talalagana huno alino ha maleno nate'niye, huno hu'niye. <sup>13</sup> Yulusalemu a kanomogae, hu'a, Aika atagi neka eno. Kagaemo atagi neka egetao lagaemo kageno, hu'a ha pai'nae.

Yulusalemu a kanomo agesayana na agufa a kanomo agegae. Agaemo lole nofi ati vayakana huno mai'niya a kanomo agegae, huno hapa pai'niye.

## 7

<sup>1</sup> Kini vekamo a'mafa'ne'amogae, huno, kagaemo kaiyale'mo su'mo vaika ali'nana kaiya'mo'mo mago'e huno kanale kaiyamo hane'niye. Kaumi'yamo aeno hapai'niya ya'e kale'yamo aeno hapai'niya ya'e'mo alopa monileti'mo miya nefaiya yafa'mo ani kava huno alagepa huno age'niya vekamo'a alo hu'niya

yafakana huno hane'niye. <sup>2</sup> Kagea kaipamo folagapi'mo mago kapugana huno hane'niye. Ani kapufi'mo nofi alagafati ani'mo havai te'niye. Kaipamo alagepa kanale kaipamo'mo ani kava huno vitimo alini'e'a magokepi ali'a anupa hu'a male'naya vitimo yaveyave ausemo folagapi'mo hane'niya vitigana huno hane'niye. <sup>3</sup> Kageamo lole nukala'mo'a ani kava huno lole kanale afela afula'mo lago'ya afela afulakana huno hane'niye. <sup>4</sup> Lugokamo'mo mago yatala vegovego no'mo yaveyave nokana huno hane'niye. Kaulagala'mo'a lole ani kotutala'mo Hesimoni taonimo yafa lafi kegi'ya kate kipate'mo hane'niya ani kotutalakana huno hane'niye. Kageamo kago'yamo kanale kago'yamo Lemanoni yahaofi'mo yatala nokana huno hane'niye. Kava ne'yagaiya vaya'mogimo ani nopi'mo mai'ne'a Namakasi taonifi mai'naya vaya'aife'mo aulu hapae'a apake'a yagai'a ne'maiye. <sup>5</sup> Kagenopamo'mo Kameli avegana huno hane'niye. Kayoka'mo okokana agufa kayoka'mo hane'niye, huno ha pai'niye.

Agaemo kini vekamo atafau'nigeno haite'a emi'ete'a nehaya yate'mo mai'niye. <sup>6</sup> Nahau nayamopafi'mo ne'nahaiya a kanomogae, huno, alagi kanale a kanomo mai'nane. Muki ya'akamo'mo namogaga aisuva agufa kava'mo nehiye. <sup>7</sup> He tika maikae'mo alagi alagepa huno api aino hane'niya kokanasi yosagana huka he tika mai'nane. Nukamo'mo ani agufa yosa alagagana huno hane'niye. <sup>8</sup> Nageamo, Ani yosafi'mo hai'na yosa akopale'mo atafauguve,

hu'na hu'nove. Hai'na maisugeno nukamo'mo nofi alagamo'a magokepi akalo akalo huno nehaneya kava huno hanegaiye. Kavayafati'mo apoli yosa alagamo'a kanale atumo ne'aiya agufa atumo aigiye. <sup>9</sup> Kavayamo nofi alagafati ani'mo hogote anikana huno hanegaiye, huno ha pai'niye.

Ani nofi alagafati ani'mo nahau nayamopafi'mo ne'nahaiya veka'nilefe'mo hane'niye. Ani ani'mo'a haga'age'mo hu'niye. Apaukalegekana hu'a ne'maiya vaya'mogimo ne'ne'apae'mo ge nehae. <sup>10</sup> Nagaemo nahau nayamopafi'mo ne'nahaiya veka'nimo a'amo mai'nogeno nagaefe'mo ha'ye nehiye, huno hu'niye.

<sup>11</sup> Nahau nayamopafi'mo ne'nahaiya veka'nimogae, huno, nage'e'mo magokepi lokaeka egeta'ao malaga ugu'ae. Uta'a alu aise taonifi'e alu aise taonifi'e'mo havaegau'ae. <sup>12</sup> Havaeteta'ae'mo kotilamisiyapi'mo he tita'a nofi hoyalegamo uta'ae'mo nofi'mo'a ago ausisimo ae'nisifi ause'amo ago aino ata le'nisifi pamagalanati yosamo'a ago ause he'nisifigeta'a uta'a agegau'ae. Mai'neta'ae'mo nahau nayamopafi'mo ne'nahaiya kava'nimo ali'na kave liguve. <sup>13</sup> Alagepa kahaumo ausemo'a alagepa atumo ne'aiye. Nagaemo alagepa yosa alagamo ali'na muki yafa lafi kegi'ya kate kipa'ale'mo male'nove. Mago'amo akeya'vilaga alige mago'amo hemenimo alige hu'na ali'na anupa hu'na male'nove. Nahau nayamopafi'mo ne'nahaiya veka'nimogae, huno, kagaetefe'mo

ali'na anupa hu'na male'nove, huno ha pai'niye.

## 8

<sup>1</sup> Nasa'nimo'a ita'nimo nu'ale'mo ne'niya nasa'nimogagana huka maisanafe'mo nahau'niye. Nasa'nimogamo mai'nanesinana kumatega kagete'nae'mo kahae'na ne'nesugeno'ae'mo mago vekamo'a ani kavafe'mo hosu agesamo afa'a o'afiyesine.

<sup>2</sup> Inagi nagaemo kagaemo kavaleli'na ita'nimo notegamo visugekae'mo kagaemo alagepa huka afa'a alika naya malegane. Nagaemo nofi alagafati anipi'mo alagepa haga nehiya ya'mo ali'na atete'na alo hu'na kamiguve, huno ha pai'niye.

<sup>3</sup> Hoga ayateti'mo nageyutega male'nenolamaga ayateti'mo nagufale'mo natafau'niye.

<sup>4</sup> Yulusalemu a'mafa'ne anagane, huno, lokiya gefati'mo hu'nae'mo, afela afu anaga'mogi koli hutale'a apaune nehaya afu'aife'mo lapakesamo afitetapa nahau nayamopafi'mo ne'nahaiya a kanomo aupati'mo haunetapa o'ateyo. Agai'amo hau'ninageno aupati'mo he tigiye, huno hapa pai'niye.

<sup>5</sup> Ina la'amo'mo yahaofilagati'mo eno hau ayamopafi'mo hau'niya veka'amo agufale'mo atafautege'ana kako kili'ana hai'ana ne'a'ae, hu'a hu'nae.

Kagaemo apoli yosamo aepafi'mo havae'nanage'na kahaune'na kate'nove. Itakamo'mo ani yosa aepafi'mo alino kate'niye. Alino kate'niya a kanomo'mo ani yosa aepafi'mo alino kate'niye, huno ha pai'niye. <sup>6</sup> Mago

vekamo'a alagena kava'amo hu ne'maleya kava huka nagaemo alika kaipafi'mo alagena kava'mo hugekana huka hu malo. Ani kava huka nagaemo alika kayamote'mo alagena kava'mo hugekana huka hu malo. Ani kavatefe'mo nahau nayamopafi'mo nahau'niya kava'mo lokiya'amo'mo fali kava'mo lokiya'agana huno hane'niye. Nagaefe'mo hau ayamopafi'mo ohau'nifi, hu'na nagesamo ne'afuva kava'mo'a nefaliya kavakana huno hane'niye. Nahau nayamopafi'mo ne'nahaiya kava'mo atagana huno nele. He, lusi kava huno nele. <sup>7</sup> Hau ayamopafi'mo nehaiya kava'mo'a atagana huno neleyanageno ani'mo'a afa'a aeno yu osegaiye. Ani'mo hesiya'mo'mo alagi aeno ati okaegaiye. Mago vekamo'mo a kano'e'mo, Nagaefe'mo kahau kayamopafi'mo kahauiyafe'mo muki moni'anileti'mo miya faiguve, huno ha paisigeno'ae'mo, afa'a ina agufa yane, huno huteno hosu aipamo kaligiye, huno hu'niye.

<sup>8</sup> Lasatimo'mo aise a'mafa'nemo mai'nigeno nu'amo o'me'niye. Mago vekamo'mo aligefe'mo hisigetae'mo agaetegamo na agufa kava'mo hugune, huno apafi ge'niye.

<sup>9</sup> Agaemo alagepa huno taonilefe'mo yafa lafi kegi'yagana huno mai'nisigetae'mo lagaemo ani yafa lafi kegi'yale'mo siluva yafateti'mo yatala no'mo kime kime haigune. Agaemo kitagana huno mai'nisigetae'mo lagaemo agaete'mo lokiya sita yosaleti'mo no'amo kigune, hu'a ha pai'nae.

<sup>10</sup> Nagaemo mago yafa lafi kegi'yagana hu'na mai'nogeno nu'nimo'a lole yatala vegovego

notalakana huno hane'niye. Ani afina'mo fiku naha mae'nige'nae'mo aulagale'mo alagepa hu'na mai'nove, huno hapa pai'niye.

<sup>11</sup> Kini vekamo Salomoni'a nofi hoya'amo Malihamoni kotega hane'niye. Agaemo hoya'ale'mo yagai'a atesayafe'mo apavaleno apate'niye. Apakaemo nofi alagamo alisayafe'mo muki vaya'amogimo vani tauseni vani tauseni hu'a siluva yafateti'mo miya fai'a amisaya kava'mo hane'niye.

<sup>12</sup> Hoya'nimo nagai'ni hoyamo naulagale'mo hane'niye. O Salomonigae, huno, vani tauseni siluva yafa'mo alitesanage'a hoyale'mo ne'yagaiya vaya'mogi tu hataleti tu hataleti hu'a aligae.

<sup>13</sup> Hoyafi'mo ne'maina a'nimogae, huno, kagae'e'mo magokepi lokae'a mai'naya vaya'mogimo kagemo ne'afiye. Kagemo aige'na afino, huno ha pai'niye.

<sup>14</sup> Nahau nayamopafi'mo ne'nahaiya veka'nimogae, huno, malage huka emikeno. Mago alagepa afela afumo'a alagepa atumo ne'aiya ya'mo havai teno hane'niya avelegamo nagu nagu huno haine ne'eya kava huka emikeno, huno ha pai'niye.

**Saufa Kotalake Gemae**  
**The New Testament and Portions of the Old Testament**  
**in the Keyagana Language of Papua New Guinea**  
**Sampela hap Buk Baibel long tokples Keyagana long**  
**Niugini**

copyright © 2001 Wycliffe Bible Translators, Inc.

Language: Keyagana

Translation by: Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-26

---

PDF generated using Haiola and XeLaTeX on 3 Mar 2023 from source files dated 9 Oct 2020

dec78c50-71b7-5d19-97bf-bf625abcf44